

Jumaat 10/1/2020

Tukang bot orang asli maut nahas

FOTO: IHSAN BOMBA



Anggota bomba membantu menyelamatkan mangsa yang terbabas di Muadzam Shah, kelmarin.

Mangsa dipercayai cuba mengelak seekor haiwan yang melintas

Oleh NIK AMIRUL MU'MIN
NIK MIN

KUANTAN

Seorang tukang bot orang asli maut apabila kereta yang dipandunya terjatuh ke bawah tebing tepi jalan dalam kemalangan di KM31 Jalan Bukit Ibam-Rompin, Muadzam Shah, petang kelmarin.

Dalam kejadian kira-kira jam 3 petang itu, mangsa, Jabar Arid, 47, dari Kampung Tanah Abang, Endau, Mersing meninggal dunia di tempat kejadian.

Ketua Jabatan Siasatan dan Penguatkuasaan Trafik negeri, Superintendan Kamarulzaman Jusoh @ Mohamad Daud berkata, mangsa yang memandu kereta jenis Proton Gen2 dipercayai dalam perjalanan dari arah Rompin menghala ke Bukit Ibam.

Menurutnya, siasatan awal mendapati mangsa dipercayai cuba mengelak seekor haiwan yang melintas di lokasi menyebabkan kereta dipandunya hilang kawalan lalu terbabas dan

melanggar tiang elektrik sebelum terjatuh ke bawah tebing.

“Akibat kemalangan itu, mangsa mengalami kecederaan parah dan disahkan meninggal dunia di tempat kejadian dan kes disiasat mengikut Seksyen 41(1) Akta Pengangkutan Jalan 1987,” katanya.

Sementara itu, Pegawai Perhubungan Awam Jabatan Bomba dan Penyelamat Malaysia (JBPM) Pahang, Anuar Hassan berkata, enam anggota bersama sebuah jentera dari Balai Bomba dan Penyelamat Muadzam Shah ke lokasi untuk bantuan menyelamatkan.

Menurutnya, mangsa yang maut dipercayai tercampak keluar dari keretanya.